

VENDIM
Nr. 161, datë 12.7.2021

**MBI PËRCAKTIMIN E ÇMIMIT TË SHITJES SË ENERGJISË ELEKTRIKE NGA
FURNIZUESI I MUNDËSISË SË FUNDIT, PËR MUAJIN QERSHOR 2021**

Në mbështetje të nenit 16 dhe të nenit 87, pika 4, të ligjit nr. 43/2015, “Për sektorin e energjisë elektrike”, të ndryshuar; “Metodologjisë së përcaktimit të çmimit të shitjes së energjisë elektrike nga Furnizuesi i Mundësisë së Fundit”, miratuar me vendimin e Bordit të ERE-s nr. 201, datë 4.12.2017, të ndryshuar; nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 3.9.2016, Bordi i Entit Rregullator të Energjisë (ERE), në mbledhjen e tij të datës 12.7.2021, mbasi shqyrtoi relacionin nr. 102/5 prot., datë 9.7.2021, të përgatitur nga Drejtoria e Tarifave dhe Çmimeve “Mbi përcaktimin e çmimit të shitjes së energjisë elektrike nga Furnizuesi i Mundësisë së Fundit, për muajin qershor 2021”,

konstatoi se:

- Shoqëria FSHU sh.a., me shkresën e saj nr. 6465 prot., datë 26.6.2021, ka paraqitur në ERE aplikimin për miratimin e çmimit të shitjes së energjisë elektrike, për muajin qershor 2021, për klientët e lidhur në nivelin e tensionit 35 kV të cilët furnizohen nga Furnizuesi i Mundësisë së Fundit (FMF).

- FSHU sh.a. deklaroi se sasia e energjisë elektrike për mbulimin e kërkesës për furnizimin e klientëve FMF, për muajin qershor 2021, është prokuruar vetëm në treg të parregulluar, informacioni i cili merret si komunikim zyrtar nga Furnizuesi i Tregut të Lirë (FTL sh.a.).

- Sipas informacionit të zhvillimit të procedurës së blerjes së energjisë nga shoqëria FTL sh.a. evidentohet se prokurimi i energjisë në tregun e parregulluar është kryer me procedurën e datës 3.12.2020, për periudhën kohore 1.1.2021 deri më 30.6.2021, në sasinë totale prej 8,688 mwh dhe në vlerën monetare 438,744 euro, me një çmim mesatar 50.50 euro/mwh.

- Shoqëria FSHU sh.a. deklaroi se për muajin qershor 2021 energjia e prokuruar vetëm në treg të parregulluar për plotësimin e nevojës për klientët e lidhur në nivelin e tensionit 35 kV, të cilët furnizohen nga FMF është në sasinë 1,440 mwh, në vlerë prej 9,008,554 lekësh.

- Kursi i këmbimit, kur është realizuar procedura e blerjes së energjisë është kursi zyrtar i këmbimit, respektivisht 123.88 lekë/euro, i datës 3.12.2020. Nga të dhënat e publikuara në faqen zyrtare të Bankës së Shqipërisë rezulton se kursi i këmbimit është i njëjtë me kursin e këmbimit të përdorur në datën kur është realizuar procedura.

- Çmimi mesatar i ponderuar bazuar në sa më sipër rezulton 6.256 lekë/kwh.

- Kostot administrative të Furnizuesit të Mundësisë së Fundit për vitin 2021, janë vlerësuar sa ato të vitit 2020, në vlerën totale prej 1.79 lekësh/kwh.

- Tarifa e përdorimit të rrjetit të transmetimit: bazuar në vendimin nr. 212, datë 15.12.2020, “Mbi lënien në fuqi të vendimit nr. 266, datë 21.12.2018, të Bordit të ERE, në lidhje me tarifën e shërbimit të transmetimit të energjisë elektrike për vitin 2021” është 0.75 lekë/kwh.

- Tarifa e përdorimit të rrjetit të shpërndarjes në nivelin e tensionit 35 kV: bazuar në vendimin nr. 213, datë 15.12.2020, të Bordit të ERE-s, “Mbi shtyrjen e fuqisë juridike të vendimit të ERE-s nr. 199, datë 12.12.2019, për tarifat e përdorimit të rrjetit të shpërndarjes, sipas nivelit të tensionit për vitin 2021” është 1.5 lekë/kwh.

- Në zbatim të “Metodologjisë së përcaktimit të çmimit të shitjes së energjisë elektrike nga Furnizuesi i Mundësisë së Fundit” të rishikuar, llogaritjet e FSHU sh.a., si dhe përllogaritjet e ERE-s për përcaktimin e çmimit për klientët që furnizohen nga FMF-ja, për muajin qershor 2021, paraqiten në tabelën përmbledhëse si vijon:

Çmimi i FMF-së për muajin Qershor 2021

Qershor 2021		Aplikimi FSHU sh.a.	Përlllogaritjet e ERE
		Njësia	Çmimi
CBEt	Çmimi mesatar i ponderuar i blerjes në treg të panequlluar ose blerja nga prodhuesit me përparësi	Leke/kWh	6.256
Pr	Kthimi për rishikim i përcaktuar në përqindje për vitin (3%)	Leke/kWh	0.19
	Çmimi mesatar i blerjes në përditësim relevant	Leke/kWh	6.44
CA	Kosto administrative të Furnizuesit të Mundësisë së Fundit	Leke/kWh	1.79
TRr	Tarifa e përdorimit të rrjetit të transmetimit	Leke/kWh	0.75
TSHt	Tarifa e përdorimit të rrjetit të shpërndarjes	Leke/kWh	1.50
Çmimi i energjisë = CBEt + Pr* CBEt+ TRrTSHt+ CA		Leke/kWh	10.48

Për sa përcaktohet për çdo element të formulës përlllogaritëse, bazuar në informacionet e paraqitura në këtë aplikim, informacionet e procedurës së blerjes së energjisë nga FTL sh.a., si dhe vlerësimeve tona sa më sipër, rezulton se çmimi i shitjes së energjisë elektrike të furnizuar nga Furnizuesi i Mundësisë së Fundit, për muajin qershor 2021, të jetë 10.48 lekë/kwh.

Për gjithë sa më sipër, Bordi i ERE-s

VENDOSI:

1. Miratimin e çmimit të shitjes së energjisë elektrike të furnizuar nga Furnizuesi i Mundësisë së Fundit prej 10.48 lekësh/kwh, për muajin qershor 2021.

2. Drejtoria e Tarifave dhe Çmimeve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim, brenda 7 ditëve kalendarike, si dhe mund të bëhet ankimi në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETAR
Petrit Ahmeti**